

ԿԱՔԱՎԻ ԳՈՎՔԸ

Արև բացվեց թուխ ամպերեն,
 Կաքավ թըռավ կանաչ սարեն,
 Կանաչ սարեն՝ սարի ծերեն,
 Բարև բերավ ծաղիկներեն.
 5 Սիրունիկ, սիրունիկ,
 Նախշուն կաքավիկ:

Քո բուն հյուսած ծաղիկներով՝
 Շուշան, նարգիզ, նունուֆարով,
 Քո տեղ լըցված ցող ու շաղով,
 10 Քընես, կելնես երգ ու տաղով.
 Սիրունիկ, սիրունիկ,
 Նախշուն կաքավիկ:

Քո թև փափուկ ու խատուտիկ,
 Պըստի կըտուց, կարմիր տոտիկ,
 15 Կարմիր-կարմիր տոտիկներով,
 Կըշորորաս ճուտիկներով.
 Սիրունիկ, սիրունիկ,
 Նախշուն կաքավիկ:

Երբ կըկանգնես մամոռտ քարին,
 20 Սաղմոս կասես ծաղիկներին,
 Սարեր ձորեր զըվարթ կանես,
 Դարդի ծովեն սիրտ կըհանես.
 Սիրունիկ, սիրունիկ,
 Նախշուն կաքավիկ: